

# ZAKON O SUDSKIM TAKSAMA ZENIČKO DOBOJSKOG KANTONA

("Službene novine Zeničko-dobojskog kantona" br. 1/2016 - prečišćen tekst)

## DIO PRVI- OPĆE ODREDBE

### Član 1

(Plaćanje sudske takse)

- (1) Ovim zakonom propisuje se način plaćanja sudske takse u postupku pred sudovima Zeničko-dobojskog kantona (u daljem tekstu: Kanton).
- (2) Postupci u kojima se plaća sudska taksa i visina sudske takse za pojedine radnje, utvrđeni su u Tarifi sudskih taksi, koja se nalazi u prilogu ovog zakona i čini njegov sastavni dio.

### Član 2

(Obveznik plaćanja takse)

- (1) Sudske takse (u daljem tekstu: taksa) propisane ovim zakonom plaća lice po čijem zahtjevu ili u čijem interesu se preduzimaju radnje u postupku, za koje je ovim zakonom utvrđeno plaćanje takse (u daljem tekstu: takseni obveznik).
- (2) Za podneske i zapisnike koji zamjenjuju podneske taksu je dužno da plati lice koje podnosi podneske, lice na čiji zahtjev se sastavlja zapisnik, odnosno lice u čijem interesu se preduzimaju radnje.
- (3) Za odluku prvostepenog suda taksu je dužan da plati tužilac, odnosno predlagač, odnosno tražilac izvršenja, a za sudsku nagodbu taksu su dužne da plate obje strane, ukoliko u nagodbi nije drugačije ugovoreno.
- (4) Za odluku drugostepenog suda i za odluku po vanrednom pravnom sredstvu, taksu je dužan da plati podnosilac žalbe, odnosno lice u čijem interesu je pokrenut postupak po vanrednom pravnom sredstvu.
- (5) Kada su u skladu sa odredbama ovog zakona taksu dužna da plate dva ili više lica zajedno, njihova obaveza je solidarna.

### Član 3

(Plaćanje takse u zemljišno-knjižnim postupcima)

- (1) Taksu za upis u zemljišno-knjižnim postupcima dužno je platiti lice u čiju se korist vrši upis. Ako upis traži lice čije se pravo ograničava, opterećuje, ukida ili prenosi na drugo lice, to lice takođe solidarno jamči za plaćanje takse sa licima u čiju se korist vrši upis.
-

(2) Taksa za upis u zemljišno-knjižnim postupcima plaća se i kad se upis vrši po službenoj dužnosti, ako se ne radi o upisu koji je oslobođen od takse.

(3) Ako se u zemljišno-knjižnim postupcima, na osnovu jednog zahtjeva, upisuje više prava u korist jednog lica, taksa se plaća onoliko puta koliko se upisa traži.

(4) Taksa za upis u zemljišno-knjižnim postupcima plaća se i kad se upis vrši u toku parničnog, vanparničnog ili izvršnog postupka.

(5) Za davanje usmenih informacija i obavještenja u zemljišno-knjižnim postupcima se ne naplaćuje ni sudska taksa ni dodatni troškovi.

#### Član 4

(Obavezno dostavljanje dokaza o plaćenju taksi)

(1) Uz podnesak (tužba, prijedlog, pravni lijek i dr.) obavezno se dostavlja dokaz o plaćenju taksi.

(2) Ukoliko stranka smatra da ispunjava zakonom propisane uslove da bude oslobođena plaćanja takse, mora uz podnesak podnijeti i zahtjev za oslobađanje od plaćanja takse.

(3) U vlasničkim sporovima o nekretninama, uz podnesak se obavezno prilaže i dokaz o utvrđenoj vrijednosti nekretnine.

#### Član 5

(Vrijeme nastanka obaveze plaćanja takse)

Ako ovim zakonom nije drugačije propisano, taksena obaveza nastaje:

a) za sudske odluke - danom donošenja sudske odluke, a ukoliko jedna od stranaka nije prisustvovala glavnoj raspravi, od dana dostavljanja pismene obavijesti o datumu donošenja odluke, odnosno danom dostavljanja odluke ako se dostava vrši u skladu sa zakonskim odredbama o dostavi;

b) za sudske nagodbe - kada se zaključe;

c) za paušalnu taksu u postupku raspravljanja zaostavštine - danom donošenja rješenja o nasljeđivanju;

d) u postupku stečaja - danom donošenja rješenja o glavnoj diobi u postupku stečaja;

e) u postupku likvidacije - danom donošenja rješenja o zaključenju likvidacionog postupka;

f) za sudske prepise - kada se zatraže od suda;

g) za ostale radnje - kada se zatraži njihovo preduzi-manje.

#### Član 6\*\*

(Naknadno plaćanje takse)

---

(1) Izuzetno od obaveze iz člana 4. ovog zakona, za podneske i odluke u upravnim sporovima u stvarima penzijskog, invalidskog i zdravstvenog osiguranja, dječijeg dodatka, starateljstva, socijalne pomoći i zakonskog izdržavanja, taksa se plaća samo ako tužba bude odbijena ili odbačena.

(2) Taksena obaveza iz stava (1) ovog člana nastaje danom donošenja odluke.

#### Član 7

(Obračun i kontrola plaćanja takse)

(1) Visinu takse utvrđuje sud.

(2) Ako taksa nije plaćena sud poziva stranku da je plati. Ukoliko i pored toga stranka ne plati taksu, sud o tome donosi rješenje.

(3) Protiv tog rješenja stranka ima pravo žalbe. Rok za žalbu je 8 dana.

#### Član 8

(Način plaćanja takse)

Takse predviđene Taksenom tarifom su prihod Budžeta Kantona i plaćaju se u gotovom novcu uplatom na propisani račun javnih prihoda.

#### Član 9

(Rok zastare naplate takse)

Pravo na naplatu takse zastarijeva u roku od pet (5) godina od dana nastanka taksene obaveze.

### DIO DRUGI- OSLOBAĐANJE OD PLAĆANJA TAKSE

#### Član 10

(Oslobodeni od obaveze plaćanja takse)

(1) Od plaćanja takse oslobođeni su:

- a) država Bosna i Hercegovina i njeni organi,
  - b) entiteti i njihovi organi,
  - c) Brčko Distrikt Bosne i Hercegovine,
  - d) kantoni i njihovi organi,
  - e) jedinice lokalne samouprave,
  - f) Agencija za privatizaciju Zeničko-dobojskog kantona,
  - g) ustanove socijalne zaštite,
-

- h) osnovne i srednje škole sa područja Zeničko-dobojskog kantona,
- i) dobitnik ratnog priznanja ili odlikovanja, ratni vojni invalid, član porodice šehida, poginulog, umrlog, nestalog branioca, član uže porodice poginulog, umrlog ili nestalog dobitnika ratnog priznanja ili odlikovanja, nezaposleni demobilizirani branilac, kao i invalid sa procentom invalidnosti iznad 60%,
- j) pravna i fizička lica koja vrše ovjeru potpisa na ugovorima o otkupu stana na kojima postoji stanarsko pravo u postupku privatizacije stanova,
- k) djeca predškolskog uzrasta, učenici i studenti za vrijeme redovnog školovanja,
- l) izdržavana lica u postupcima utvrđivanja i ostvarivanja prava po osnovu zakonskog izdržavanja,
- m) lice u sporu u vezi sa ostvarivanjem njegovih prava iz radnog odnosa,
- n) nasljednici prvog nasljednog reda za raspravljanje zaostavštine i za uknjižbu vlasništva odnosno suvlasništva na nasljeđenim nekretninama,
- o) notari kad u ostavinskom postupku postupaju kao povjerenici suda.

(2) Takse za podneske i radnje ne plaća lice koje poklanja svoju imovinu organima iz stava (1) ovog člana, socijalno-humanitarnim, naučnim ili kulturnim organizacijama, ustanovama ili fondacijama ili crkvama i vjerskim zajednicama.

(3) Strano fizičko i pravno lice je oslobođeno plaćanja takse ako je to predviđeno međunarodnim ugovorom ili pod uslovom reciprociteta. U slučaju sumnje o postojanju reciprociteta, prethodno se pribavlja mišljenje nadležnog ministarstva Bosne i Hercegovine.

## Član 11

(Kada se po zakonu ne plaća sudska taksa)

(1) U zemljišno-knjižnim postupcima ne plaća se taksa za:

- a) upis opravdanja predbilježbe,
- b) potpuno ili djelimično brisanje nekog upisanog prava,
- c) službene radnje u postupku uređenja, zasnivanja i ispravljanja zemljišnih knjiga, osim ako je greška nastala krivicom titulara prava, u postupku usklađivanja zemljišnih knjiga sa faktičkim stanjem, kao i u postupku za obnavljanje uništenih zemljišnih knjiga, ukoliko se vjerodostojnom ispravom utvrdi da je upis bio prije proveden,
- d) upis sprovođenja odluke o diobi prava vlasništva ili prava služnosti korištenja, ako su učesnici diobe bili upisani kao suvlasnici tih prava,
- e) za zabilježbu privremene uprave određene u toku postupka prinudne javne prodaje, kao i za zabilježbu prinudne uprave određene umjesto prinudne javne prodaje,

f) naknadni upis supružnika kao suvlasnika na osnovu sudske odluke, ako je jedan od supružnika upisan kao vlasnik u zemljišnim knjigama, kao i za upis kojim se označava idealni dio svakog supružnika na nekretninama koje su u njihovom suvlasništvu,

g) upis u zemljišne knjige prava konstituisanih zakonom u korist građana,

h) sve ostale radnje koje se poduzimaju po službenoj dužnosti.

(2) U postupku stečaja i likvidacije taksa se ne plaća za:

a) podneske stečajnog ili likvidacionog upravnika,

b) podneske kojima se prijavljuje upis stečajnog ili likvidacionog postupka, ili upis u sudski registar koji se vrši po službenoj dužnosti.

(3) Za upis odluke o otvaranju stečajnog postupka, odluke o pokretanju postupka likvidacije, kao i odluke o zabrani obavljanja određene djelatnosti, odnosno poslova pravnog lica, ne plaća se taksa.

## Član 12

(Sudsko oslobađanje)

(1) Sud može osloboditi obveznika od plaćanja takse ako bi plaćanjem takse, imajući u vidu visinu sredstava iz kojih se obveznik i članovi njegove porodice izdržavaju, ta sredstva bila u tolikoj mjeri umanjena da bi time bila ugrožena njihova egzistencija.

(2) Odluku iz stava (1) ovog člana donosi sud na pismeni zahtjev taksenog obveznika. Prije donošenja odluke, sud će cijeniti sve okolnosti, a naročito će uzeti u obzir vrijednost mjerodavnu za naplatu takse, ukupan prihod i imovinu taksenog obveznika i članova njegovog domaćinstva, kao i broj lica koja takseni obveznik izdržava.

(3) Pod porodicom u smislu odredaba ovog zakona se podrazumjeva porodica kako je to definisano članom 2. stav (1) Porodičnog zakona Federacije Bosne i Hercegovine ("Službene novine Federacije Bosne i Hercegovine", broj: 35/05).

## Član 13

(Dokazi za oslobađanje od obaveze za plaćanje takse)

(1) Visina prihoda taksenog obveznika i članova njegove porodice, dokazuje se na osnovu uvjerenja nadležnog organa uprave, odnosno drugih pismenih dokaza koje je takseni obveznik dužan da podnese o svom imovnom stanju.

(2) Uvjerenje iz stava (1) ovog člana služi kao dokaz za oslobađanje od plaćanja takse samo ako od njegovog izdavanja do podnošenja zahtjeva za oslobađanje nije proteklo više od mjesec dana.

(3) Kada je to potrebno, sud može, po službenoj dužnosti, pribaviti potrebne podatke i obavještenja o imovnom stanju taksenog obveznika i članova njegove porodice, a može o tome saslušati i protivnu stranku.

## Član 14

---

(Rješenje o oslobađanju od obaveze plaćanja takse)

(1) Rješenje o oslobađanju od obaveze plaćanja takse odnosi se na sve takse po odgovarajućem predmetu, bez obzira kada je nastala taksena obaveza.

(2) Sud može u toku postupka ukinuti rješenje o oslobađanju od plaćanja takse ako utvrdi da je takseni obveznik u stanju da plati taksu, a tom prilikom će odlučiti da li će takseni obveznik u potpunosti ili djelimično platiti taksu od koje je bio ranije oslobođen.

Član 15

(Važenje oslobađanja od obaveze plaćanja takse)

(1) Oslobađanje od obaveze plaćanja takse dato u parničnom i vanparničnom postupku, kao i u postupku u upravnim sporovima važi i u postupku izvršenja odluka donijetih u tim postupcima, ako se izvršenje zahtjeva u roku od tri mjeseca po pravosnažnom okončanju postupka.

(2) Oslobađanje od obaveze plaćanja takse u vanparničnom i izvršnom postupku važi i u parničnom postupku koji nastane u toku i povodom vanparničnog i izvršnog postupka.

Član 16

(Lica koja nisu dužna plaćati taksu za drugog)

(1) Staralac lica čije je boravište nepoznato, staralac imovine čiji je sopstvenik nepoznat, kao i privremeni zastupnik stranke koga sud postavi u postupku, nisu dužni da plaćaju takse za lica koje zastupaju.

(2) Naplata takse u slučajevima iz stava (1) ovog člana vrši se iz imovine lica koja se zastupaju.

(3) Neplaćenu taksu u slučajevima iz stava (1) ovog člana sud će unositi u popis taksi i po završetku postupka postupiće u skladu sa odredbama člana 31. ovog zakona.

Član 17

(Lica na koje se odnosi oslobađanje od obaveze plaćanja takse)

(1) Oslobađanje od obaveze plaćanja takse odnosi se samo na lica kome je to oslobađanje priznato.

(2) Kada više lica zajednički predaju podnesak ili zajedno preuzmu radnju u postupku, a jedno ili više njih je oslobođeno od obaveze plaćanja takse, lica koje nije oslobođeno dužno je da plati taksu kao da nema oslobođenih od obaveze plaćanja takse.

Član 18

(Uspjeh u postupku i obaveza plaćanja takse)

(1) Ako u parničnom i izvršnom postupku lice oslobođeno od obaveze plaćanja takse uspije u postupku, taksu koju bi ono bilo dužno da plati da nije bilo oslobođeno, platiće stranka koja ne uživa oslobađanje i to u srazmjeri u kojoj je oslobođena stranka uspjela u postupku.

(2) Ako se između stranke oslobođene od obaveze plaćanja takse i stranke koja nije oslobođena zaključi sudska nagodba, taksu koju bi trebalo da plati oslobođena stranka platiće stranka koja nije oslobođena, osim ako se stranke drugačije ne dogovore.

## Član 19

(Popis takse za plaćanje)

(1) Kada u postupku pred sudom učestvuju na jednoj strani lice koje je oslobođeno od obaveze plaćanja takse, a na drugoj lice koje nije oslobođeno, sud je dužan da vodi i popis takse koju bi trebalo da plati oslobođeno lice.

(2) Popis takse se zaključuje po završetku postupka. Ako se postupak završi na način predviđen članom 18. ovog zakona sud će postupiti u skladu sa odredbama člana 31. ovog zakona.

## DIO TREĆI - UTVRĐIVANJE VRIJEDNOSTI PREDMETA SPORA RADI NAPLATE TAKSE

### Član 20

(Utvrdjivanje vrijednosti predmeta spora u parničnom postupku)

(1) U parničnom postupku taksa se plaća prema vrijednosti predmeta spora.

(2) Ako ovim zakonom nije drugačije određeno, odredbe propisa o parničnom postupku, na osnovu kojih se utvrđuje vrijednost spora, primjenjuju se i prilikom određivanja vrijednosti spora radi naplate takse.

### Član 21

(Utvrdjivanje vrijednosti predmeta spora kod više tuženih)

Ako tužilac jednom tužbom obuhvati dva ili više tuženih i traži da tužbeni zahtjev bude usvojen prema slijedećem tuženom, u slučaju da bude pravosnažno odbijen prema onome koji je u tužbi naveden prije njega, ili ako prema svakom od njih ističe isti zahtjev, ili ako prema pojedinim od njih ističe različite zahtjeve koji su u međusobnoj vezi, vrijednost predmeta spora radi naplate takse određuje se prema zahtjevu čija je vrijednost najveća.

### Član 22

(Utvrdjivanje vrijednosti predmeta spora u sporovima u vezi sa zakonskim izdržavanjem)

Ako je predmet spora pravo na zakonsko izdržavanje ili potraživanje pojedinih iznosa zakonskog izdržavanja, vrijednost predmeta spora radi naplate takse računa se prema zbiru davanja za tri mjeseca, ako se izdržavanje ne traži za kraće vrijeme.

### Član 23

(Utvrdjivanje vrijednosti predmeta spora u sporovima iz nasljednog prava)

Ako je predmet spora nasljedno pravo na cijeloj zaostavštini, kao vrijednost predmeta spora uzima se vrijednost čiste zaostavštine, a ako je predmet spora samo jedan dio zaostavštine ili određena stvar iz zaostavštine, kao vrijednost predmeta spora uzima se čista vrijednost tog dijela, odnosno stvari.

#### Član 24\*\*\*

(Utvrđivanje vrijednosti predmeta spora u vlasničko-pravnim sporovima)

Vrijednost predmeta spora u vlasničko-pravnim sporovima o nepokretnostima, određuje sudija koji vodi postu-pak prema prometnoj vrijednosti nepokretnosti koja je predmet spora.

#### Član 25

(Šta se uzima kao vrijednost predmeta spora radi naplate takse)

Kao vrijednost predmeta spora radi naplate takse uzima se:

- a) u diobnim parnicama - vrijednost dijela imovine koja se izdvaja iz zajedničke imovine koja je predmet diobe;
- b) u parnicama u kojima je predmet spora izvršenje kakve radnje ili trpljenje ili nečinjenje ili izjava volje ili utvrđenje da postoji ili ne postoji neko pravo ili pravni odnos ili da se utvrdi istinitost ili neistinitost kakve isprave - iznos koji je tužilac označio u tužbi s tim da taj iznos ne može biti manji od 500,00 KM;
- c) u parnicama za proglašenje prestanka važnosti ugovora o arbitraži - iznos od 500,00 KM;
- d) u sporovima o stvarnim i ličnim služnostima i o doživotnom izdržavanju - iznos od 500,00 KM;
- e) u sporovima o utvrđivanju reda prvenstva potraživanja u izvršnom postupku - visina potraživanja, a najviše 1.000,00 KM.

#### Član 26

(Najniži iznos predmeta vrijednosti spora)

Ako se po odredbama članova od 20. do 26. ovog zakona ne može utvrditi vrijednost predmeta spora, kao vrijednost se uzima iznos od 500,00 KM.

#### Član 27

(Utvrđivanje vrijednosti predmeta spora u izvršnom postupku)

- (1) U izvršnom postupku plaća se taksa prema vrijednosti zahtjeva koji treba izvršiti.
- (2) Pri utvrđivanju vrijednosti zahtjeva u izvršnom postupku za naplatu takse shodno se primjenjuju odredbe članova od 20. do 26. ovog zakona.

#### Član 28

---

(Utvrđivanje vrijednosti predmeta spora u upravnim sporovima)

- (1) U upravnim sporovima plaća se taksa prema vrijednosti predmeta spora, ako je predmet spora procjenjiv.
- (2) Vrijednost procjenjivog spora utvrđuje se shodno odredbama člana od 20. do 26. ovog zakona.
- (3) Ako predmet spora nije procjenjiv, plaća se taksa kao u Tarifnom broju 23. Tarife sudskih taksl.

#### Član 29

(Utvrđivanje vrijednosti predmeta spora u ostalim postupcima)

Kada je u vanparničnom postupku, u zemljišno-knjižnom postupku, u stečajnom postupku i postupku likvidacije za plaćanje takse mjerodavna vrijednost zahtjeva, za njeno utvrđenje će se shodno primjenjivati odredbe člana od 20. do 26. ovog zakona, ako u Tarifi sudskih taksi nije drugačije određeno

#### Član 30

(Promjena vrijednosti predmeta spora u toku postupka)

- (1) Ukoliko u toku trajanja postupka dođe do promjene vrijednosti spora mijenja se i osnov za utvrđivanje plaćanja sudske takse, pa se ista utvrđuje prema izmjenjenoj vrijednosti spora.
- (2) Ako se pravnim lijekom, odnosno prigovorom protiv rješenja o izvršenju, odluka pobija samo u jednom dijelu, za plaćanje takse za pravni lijek, odnosno prigovor uzima se vrijednost samo pobijanog dijela.
- (3) Ako pravni lijek ulažu obje stranke, taksa za pravni lijek određuje se posebno za svaku stranku prema vrijednosti onog dijela odluke koji se pravnim lijekom pobija.
- (4) U statusnim sporovima, u sporovima za utvrđivanje i u sporovima u kojima se tužbeni zahtjev ne odnosi na novčani iznos, za plaćanje takse za pravni lijek, mjerodavna je vrijednost prema kojoj je plaćena taksa za tužbu.
- (5) Za pravni lijek koji se ulaže samo protiv odluke o troškovima postupka ili odluke o sporednim potraživanjima, taksa se plaća samo prema iznosu troškova postupka ili iznosu sporednih potraživanja.

### DIO ČETVRTI- POSTUPAK ZA NAPLATU NEPLAĆENE TAKSE

#### Član 31

(Naplata neplaćene takse)

- (1) Takse čiji se iznos određuje na kraju postupka, takseni obveznik je dužan platiti u roku od 8 dana od prijema rješenja iz člana 7. ovog zakona.
-

(2) Ako takseni obveznik ne plati taksu u navedenom roku, ista će se naplatiti u skladu sa Zakonom o izvršnom postupku ("Službene novine Federacije BiH", broj: 32/03, 52/03, 33/06, 39/06 i 39/09).

(3) Postupak za naplatu neplaćene takse pokreće pred nadležnim sudom Kantonalno pravobranilaštvo.

## DIO PETI - POVRAT TAKSE

### Član 32

(Pravo na povrat plaćene takse)

(1) Lice koje je platilo taksu koju uopšte nije bila dužno da plati ili je platilo taksu u iznosu većem od propisanog, kao i lice koje je platilo taksu za sudsku radnju, a ta radnja iz bilo kog razloga nije izvršena, ima pravo na povrat takse.

(2) Postupak za povrat takse pokreće se na zahtjev lica iz stava (1).

### Član 33

(Rok za podnošenje zahtjeva za povrat plaćene takse)

Zahtjev za povrat takse se podnosi sudu u roku od 30 dana od dana kada je taksa plaćena, odnosno od dana saznanja da sudska radnja nije izvršena, a najkasnije u roku od godinu dana od dana kada je taksa plaćena.

### Član 34

(Zahtjev za povrat plaćene takse u slučaju medijacije)

Ako se stranke, u toku postupka, a najkasnije do zaključenja glavne rasprave, sporazumiju da će pristupiti rješavanju spora u postupku medijacije i u postupku medijacije postignu sporazum, imaju pravo na povrat naplaćene takse u punom iznosu.

### Član 35

(Rješenje o usvajanju zahtjeva za povrat plaćene takse)

Ukoliko usvoji zahtjev za povrat takse, sud će primjerak rješenja dostaviti i nadležnom ministarstvu, radi izvršenja povrata.

### Član 36

(Kada se ne plaća taksa)

U postupku povrata takse ne plaća se taksa.

## DIO ŠESTI - NADZOR NAD PRIMJENOM OVOG ZAKONA

### Član 37

---

(Nadležan organ za vršenje nadzora)

Nadzor nad provedbom odredaba ovog zakona vrši Ministarstvo za pravosuđe i upravu Kantona, izuzev dijela koji se odnosi na Tarifu sudskih taksi, nad kojom nadzor vrši Ministarstvo finansija Kantona.

## DIO SEDMI - PRELAZNE I ZAVRŠNE ODREDBE

### Član 38

(Plaćanje takse u prelaznom razdoblju)

(1) Za podneske, radnje i isprave po kojima je taksena obaveza nastala do dana početka primjene ovog zakona, a taksa nije plaćena, taksa će se platiti u skladu sa tarifom koja je važila do dana početka primjene ovog zakona.

(2) Taksa koja nije plaćena do stupanja na snagu ovog zakona naplatit će se u skladu sa članom 31. ovog zakona.

(3) Ako je do dana početka primjene ovog zakona plaćena taksa za radnju, koja će se izvršiti poslije početka njegove primjene, neće se plaćati nova taksa po ovom zakonu, niti će se vraćati više naplaćena taksa.

(4) Ako je takseni obveznik oslobođen plaćanja takse u postupku, koji do dana početka primjene ovog zakona nije okončan, dato oslobađanje važi i poslije početka primjene ovog zakona.

### Član 39

(Prestanak primjene ranijih propisa)

Danom početka primjene ovog zakona prestaje da važi Zakon o sudskim taksama Zeničko-dobojskog kantona ("Službene novine Zeničko-dobojskog kantona", broj: 1/97, 11/98, 14/98, 16/00, 4/04 i 4/08).

### Član 40

(Završne odredbe)

Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona", a početak će se primjenjivati 30 dana nakon stupanja na snagu.

## TARIFA SUDSKIH TAKSI

### DIO PRVI - PARNIČNI I IZVRŠNI POSTUPAK

Tarifni broj 1.

(Taksa za podneske)

(1) Za tužbu, protivtužbu, prijedlog za ponavljanje postupka, prijedlog da se prizna odluka stranog suda i odluka stranog arbitražnog suda, plaća se, prema vrijednosti predmeta spora, slijedeća taksa:

- a) do 500,00 KM 20,00 KM;
- b) preko 500,00 do 1.500,00 KM 50,00 KM;
- c) preko 1.500,00 do 3.000,00 KM 80,00 KM;
- d) preko 3.000,00 do 10.000,00 KM 150,00 KM;
- e) preko 10.000,00 do 50.000,00 KM 300,00 KM;
- f) preko 50.000,00 do 100.000,00 KM 500,00 KM;
- g) preko 100.000,00 KM 1% na označenu vrijednost spora, aline više od 8.000,00 KM;

- (2) Za tužbu za utvrđivanje i osporavanje očinstva, plaća se taksa u iznosu od 50,00 KM.
  - (3) Za tužbu kojom se traži razvod braka, poništenje braka, utvrđivanje postojanja i nepostojanja braka i utvrđivanje da je brak zaključen plaća se taksa u iznosu od 100,00 KM, a za prijedlog za sporazumni razvod braka taksa u iznosu od 50 KM.
  - (4) Za tužbu zbog smetanja posjeda plaća se taksa u iznosu od 50,00 KM.
  - (5) Za tužbu zbog iseljenja plaća se taksa u iznosu od 100,00 KM.
  - (6) Za tužbu zbog otkaza ugovora o zajmu ili zakupu stvari, za tužbu o otkazu ugovora o zakupu poslovnih prostorija plaća se taksa u iznosu od 100,00 KM.
  - (7) Za prijedlog da se dozvoli izvršenje ili obezbjeđenje ili izda privremena mjera, za prijedlog za povrat u prijašnje stanje, za prijedlog za obezbjeđenje dokaza prije pokretanja parnice, za prijedlog za određivanje sudske mjere osiguranja, plaća se polovina takse propisana ovim tarifnim brojem.
  - (8) Za prijedlog kojim se daje otkaz ugovora o zakupu poslovnih prostorija, plaća se taksa u iznosu od 100,00 KM.
  - (9) Za prijedlog da se prizna odluka inostranog suda u statusnim stvarima plaća se taksa u iznosu od 100,00 KM, a za žalbu protiv donesenog rješenja - 150,00 KM.
  - (10) Za žalbu ili reviziju protiv presude i za žalbu protiv rješenja u sporovima zbog smetanja posjeda, plaća se taksa propisana stavom (1) ovog tarifnog broja uvećana za 50%.
  - (11) Za žalbu protiv rješenja kojim je odbijen prijedlog za povrat u prijašnje stanje plaća se polovina takse prema vrijednosti predmeta spora iz stava (1) ovog tarifnog broja, ali ne više od 200,00 KM.
  - (12) Za žalbu ili reviziju protiv ostalih rješenja plaća se taksa propisana u stavu (1) ovog tarifnog broja.
-

(13) Za zahtjev za donošenje odluke sa kojim će roditeljem dijete živjeti, plaća se taksa u visini 50 KM.

(14) Za zahtjev o načinu održavanja ličnih i neposrednih kontakata između roditelja sa kojim dijete ne živi, plaća se taksa u visini 50,00 KM.

(15) Za zahtjev za ponavljanje postupka, za žalbu protiv rješenja o odbačaju revizije, koju donosi prvostepeni sud, plaća se taksa propisana stavom (7) ovog tarifnog broja.

(16) Za žalbu protiv rješenja o odbačaju žalbe, protiv rješenja o odbačaju ili odbijanju prijedloga za ponavljanje postupka plaća se taksa propisana stavom (7) ovog tarifnog broja.

(17) Ne plaća se posebna taksa za prepisivanje iz Tarifnog broja 27. ove tarife, ako je zapisnik trebalo sastaviti u više primjeraka.

(18) Kad je u tužbi stavljen prijedlog za određivanje sudske mjere osiguranja ili kada se u žalbi stavi prijedlog za povrat u prijašnje stanje, plaća se, pored takse na tužbu, odnosno žalbu i taksa na prijedlog propisana stavom (7) ovog tarifnog broja.

(19) Za prijedlog da se dozvoli izvršenje ili obezbjeđenje ili da se odredi sudska mjera osiguranja, plaća se jedna taksa i kad se predloži istovremeno ili naknadno više sredstava izvršenja, odnosno obezbjeđenja.

Tarifni broj 2.

(Taksa za odluke)

(1) Za presudu prvostepenog suda i rješenje o priznavanju odluke stranog suda ili odluke stranog arbitražnog

suda, plaća se taksa prema taksenoj osnovici, propisanoj tarifnim brojem 1. ove Tarife.

(2) Za presudu zbog propuštanja, presudu zbog odricanja i za presudu na osnovu priznanja donesenu najkasnije na pripremnom ročištu, odnosno na ročištu za glavnu raspravu, ako pripremno ročište nije održano, plaća se polovina takse propisane Tarifnim brojem 1. ove tarife.

(3) Za rješenje o odbacivanju tužbe, povlačenju tužbe koje se shodno Zakonu o parničnom postupku donosi prije ili u toku prvostepenog postupka i na rješenje u postupku zbog smetanja posjeda plaća se polovina takse propisane tarifnim brojem 1. ove tarife, ali ne više od 200,00 KM.

(4) Za rješenje o prijedlogu za dozvolu izvršenja ili obezbjeđenja, kao i za rješenje o određivanju sudske mjere osiguranja, odnosno naredbe, plaća se polovina takse propisane tarifnim brojem 1. ove tarife.

(5) Za rješenja o prekidu postupka, odbacivanju ili odbijanju zahtjeva za ponavljanje postupka o odbačaju revizije, koja donese prvostepeni sud, plaća se polovina takse propisane tarifnim brojem 1. ove tarife, ali ne više od 200,00 KM.

(6) Za rješenja o prekidu postupka, odbacivanju ili odbijanju zahtjeva plaća se polovina takse propisane tarifnim brojem 1. ove tarife, ali ne više od 200,00 KM.

---

(7) Za odluku suda sa kojim će roditeljem dijete živjeti i odluku o načinu održavanja ličnih i neposrednih kontakata između roditelja sa kojim dijete ne živi, plaća se polovina takse propisane tarifnim brojem 1. ove tarife.

(8) Za presudu prvostepenog suda koja je donesena u vezi sa protivtužbom plaća se taksa kao da je o protivtužbi posebno raspravljano.

(9) Ako je više parnica spojeno radi zajedničkog raspravljanja, taksa za presudu plaća se posebno za svaku parnicu, kao da ne postoji spajanje više parnica.

(10) Za dopunsku presudu ili rješenje neće se plaćati taksa ako je za odluku koja je dopunjena plaćena taksa prema punoj vrijednosti spora. Takođe se neće plaćati taksa za donošenje odluke kojom se vrši naknadna ispravka ranije donijete odluke.

(11) Za rješenje o izvršenju ili obezbjeđenju, plaća se jedna taksa, bez obzira da li je odlučeno o više sredstava izvršenja, odnosno obezbjeđenja i bez obzira da li je odlučeno istovremeno ili naknadno.

Tarifni broj 3.

(Taksa za sudsku nagodbu)

Za sudsku nagodbu u toku prvostepenog postupka plaća se prema vrijednosti na koju su se stranke nagodile, polovina takse propisane Tarifnim brojem 1. ove tarife.

## DIO DRUGI - VANPARNIČNI POSTUPAK

Tarifni broj 4.

(Opšte odredbe)

(1) Za prijedlog kojim se pokreće postupak u vanparničnoj stvari, izuzev kada se radi o postupcima koji su predviđeni u tarifnim brojevima od 8. do 12. ove tarife, plaća se taksa u iznosu od 60,00 KM.

(2) Za prijedlog i odluku za proglašenje nestalog lica u ratu umrlim i dokazivanje smrti lica u ratu, ne plaća se taksa.

(3) Taksa na nalog za iseljenje iz poslovnih prostorija uračunava se u taksu na odluku suda koja bude donijeta povodom prigovora protiv naloga. Ako je taksa na nalog veća od takse koja je plaćena na odluku povodom prijedloga za izdavanje naloga za iseljenje iz poslovnih prostorija, u tom slučaju će se naplatiti razlika.

Tarifni broj 5.

(Taksa za odluku u vanparničnom postupku)

(1) Za odluku suda u vanparničnom postupku plaća se taksa u iznosu od 50,00 KM.

(2) U svim vanparničnim postupcima primjenjivaće se shodno odredbe stava (8) iz Tarifnog broja 2. ove tarife.

Tarifni broj 6.

(Taksa za sudsku nagodbu u vanparničnom postupku)

Za sudsku nagodbu u svim vanparničnim postupcima plaća se taksa u iznosu od 50,00 KM.

Tarifni broj 7.

(Taksa za žalbu u vanparničnom postupku)

Za žalbu protiv odluke prvostepenog suda u vanparničnom postupku, plaća se taksa u iznosu od 75,00 KM.

Tarifni broj 8.

(Taksa za raspravljanje zaostavštine)

(1) Za raspravljanje zaostavštine plaća se taksa prema vrijednosti čiste zaostavštine i to:

a) do 5.000,00 KM - 50,00 KM,

b) preko 5.000,00

KM do 20.000,00 - 100,00 KM,  
KM

c) preko 20.000,00

KM do 50.000,00 - 150,00 KM,  
KM

d) preko 50.000,00

KM do 100.000,00 - 200,00 KM,  
KM

e) preko

100.000,00 do - 300,00 KM,  
200.000,00 KM

f) preko

200.000,00 do - 500,00 KM,  
500.000,00 KM

g) preko

500.000,00 KM-  
500,00 KM, + 1%  
na razliku iznad - 3.000,00 KM.  
500.000,00 KM ali  
ne više od

(2) Taksa se plaća samo ako je postupak za raspravljanje zaostavštine završen donošenjem rješenja o nasljeđivanju. Taksa na rješenje o naknadno pronađenoj imovini plaća se prema vrijednosti naknadno pronađene imovine, a u skladu sa stavom (1) ovog tarifnog broja.

(3) Taksu plaćaju nasljednici u srazmjeri nasljednih dijelova.

---

(4) Prilikom utvrđivanja čiste vrijednosti zaostavštine odbiće se ostaviočevi dugovi, troškovi sahrane ostavoca, legati i drugi tereti, troškovi popisa i procjene zaostavštine i drugi troškovi.

(5) Ne plaća se posebna taksa za diobu nasljedstva ako nasljednici sporazumno predlože diobu i sporazum o diobi bude unesen u rješenje o nasljeđivanju.

(6) Za zabilježbu prvenstvenog reda i uknjižbu ustupanja prvenstva kao i za ostale zabilježbe vezane za zaostavštinu plaća se taksa propisana tarifnim brojem 14. ove tarife.

Tarifni broj 9.

(Taksa za sastavljanje i čuvanje testamenta)

Taksa u iznosu od 50,00 KM plaća se za:

- a) prijedlog za sastavljanje sudskog testamenta,
- b) sastavljanje sudskog testamenta,
- c) prijedlog kojim se traži čuvanje testamenta u sudu,
- d) opoziv testamenta sastavljenog pred sudom,
- e) prijedlog za vraćanje testamenta koji se nalazi na čuvanju u sudu,
- f) vraćanje testamenta koji se zamjenjuje.

Tarifni broj 10.

(Taksa za prijedlog i odluku u postupku diobe zajedničke imovine)

Za prijedlog i odluku da se provede dioba zajedničke imovine taksa se plaća prema vrijednosti imovine i to:

- a) do 5.000,00 KM - 50,00 KM,
- b) preko 5.000,00 KM do 20.000,00 KM - 80,00 KM,
- c) preko 20.000,00 KM do 50.000,00 KM - 130,00 KM,
- d) preko 50.000,00 KM do 100.000,00 KM - 150,00 KM,
- e) preko 100.000,00 do 200.000,00 KM - 200,00 KM,
- f) preko 200.000,00 do 500.000,00 KM - 300,00 KM,
- g) preko 500.000,00 KM vrijednosti- 500,00 KM, + 1% na razliku iznad 500.000,00 KM ali ne više od - 3.000,00 KM.

Tarifni broj 11.

---

(Taksa za prijedlog za uređenje međe)

Za prijedlog za uređenje međe plaća se taksa u iznosu od 150,00 KM.

Tarifni broj 12.

(Taksa za ovjeru potpisa, rukopisa, prijepisa i prevoda)

(1) Za podnesak kojim se traži ovjera potpisa, rukopisa, prijepisa i prevoda plaća se taksa u iznosu od 10,00 KM.

(2) Za ovjeru prepisa plaća se taksa - za prvi polutabak 10 KM, a za svaki slijedeći polutabak iznos od 5,00 KM.

(3) Za ovjeru rukopisa plaća se taksa za prvi polutabak 10 KM, a za svaki slijedeći novi polutabak iznos od 5,00 KM.

(4) Za ovjeru potpisa sudskog tumača na prijevodima plaća se taksa u iznosu od 10,00 KM.

(5) Za ovjeru potpisa na punomoći plaća se taksa u iznosu od 10,00 KM.

(6) Za ovjeru potpisa na ugovorima o prometu nepokretnosti plaća se taksa u iznosu od 50,00 KM.

(7) Za podnesak, odnosno ovjeru produženja roka važenja ugovora plaća se 50% od iznosa takse iz stava (6) ovog tarifnog broja.

(8) Kada je vrijednost ugovora procjenjiva, ali nije u ugovoru označena, za ovjeru potpisa na ugovoru plaća se dvostruka taksa iz stava (6) ovog tarifnog broja.

(9) Potpis na ispravi koju izdaju državni organi, potpisi ovlašćenih lica za potpisivanje firmi ili pravnog lica smatraju se kao jedan potpis, ako su propisima ili pravilima za potpisivanje ovlašćena dva ili više lica.

(10) Za podnesak kojim se traži ovjera potpisa (rukoznaka) na ispravi plaća se jedna taksa, bez obzira koliko se potpisa (rukoznaka) na ispravi ovjerava.

(11) Za ovjeru potpisa (rukoznaka) i pečata, plaća se jedna taksa.

(12) Ako se jednim podneskom traži ovjera potpisa (rukoznaka) na više isprava plaća se taksa za podnesak.

(13) Pod polutabakom podrazumjeva se list hartije od dvije strane formata A-4. Započeti polutabak se računa kao cijeli.

(14) Za ovjeru potpisa na punomoćju, odnosno ugovoru plaća se jedna taksa, bez obzira da li se ovjerava jedan ili više potpisa.

DIO TREĆI - ZEMLJIŠNO-KNJIŽNI POSTUPAK

Tarifni broj 13.

---

(Taksa za podneske)

Za podnesak kojim se traži upis prava vlasništva, upis ili brisanje uknjižbe, zabilježbe ili predbilježbe kao i upis prava upravljanja ili prava korišćenja na nekretninama, plaća se taksa u iznosu od 30,00 KM, dok se za podnesak kojim se traži uspostava novog zemljišnoknjižnog uloška plaća taksa u iznosu od 100,00 KM.

Tarifni broj 14.

(Taksa za upise podataka)

(1) Sudsku taksu snosi lice u čiju korist se vrši uknjižba, osim ako ugovorne strane ne utvrde drugačije.

(2) Za uknjižbu u zemljišnu knjigu plaća se:

a) uknjižba vlasništva 50,00 KM,

b) uknjižba hipoteke, zemljišnog duga ili doživotnog prava uživanja, trajnog prava korištenja, stvarnih služnosti i tereta, pravo dugoročnog najma i zakupa, prava preče kupovine i realnih tereta 50,00 KM,

c) uknjižba etažiranja objekta kolektivnog stanovanja ili poslovne zgrade 200,00 KM, a uknjižba etažiranja objekta individualnog stanovanja 70,00 KM.

Tarifni broj 15.

(Takse za prijepise i izvratke)

(1) Za prijepise i izvratke plaća se slijedeća taksa:

a) za izdavanje ovjerenog prijepisa ili službenog izvratka 10,00 KM,

b) za izdavanje uvjerenja i potvrda 5,00 KM,

c) za izdavanje prepisa ili izvratka sa istorijatom 30,00 KM.

(2) Za dopune i potvrde prijepisa i izvadata naplaćuje se ista taksa kao i za njihovo izdavanje.

Tarifni broj 16.

(Taksa za žalbu ili prigovor)

Za žalbu ili prigovor protiv rješenja u zemljišno-knjižnim postupcima plaća se taksa u iznosu od 50,00 KM.

## DIO ČETVRTI - POSTUPAK STEČAJA I LIKVIDACIJE

Tarifni broj 17.

(Takse za podneske)

---

- (1) Za prijedlog da se otvori postupak stečaja ili likvidacije, plaća se taksa u iznosu od 100,00 KM.
- (2) Za prijavu povjerilaca u postupku stečaja ili likvidacije, plaća se taksa u iznosu od 1% od vrijednosti potraživanja, s tim da ne može biti manja od 50,00 KM niti veća od 10.000,00 KM.
- (3) Za žalbu protiv odluke o stečajnom ili likvidacijskom postupku plaća se taksa u iznosu od 1% od vrijednosti potraživanja, s tim da ne može biti manja od 100,00 KM niti veća od 10.000,00 KM.
- (4) Kao osnov za plaćanje takse na prijave povjerilaca uzima se iznos potraživanja koji povjerilac prijavljuje. Pri tome će se uzimati da uslovljena tražbina nije uslovljena. Ako jedan povjerilac prijavi više potraživanja taksa se plaća na ukupan iznos tih potraživanja.

Tarifni broj 18.

(Taksa u stečajnom postupku)

- (1) U stečajnom postupku, od zbira iznosa koji su upotrebljeni ili stoje na raspolaganju za podmirenje dugova stečajne mase, plaća se taksa u iznosu od 100,00 KM do 1.000,00 KM, u zavisnosti od složenosti postupka.
- (2) Taksu u stečajnom postupku određuje sud po okončanju postupka, a dužan je platiti stečajni upravnik iz stečajne mase nakon pravosnažnosti rješenja o glavnoj ili naknadnoj diobi.

DIO PETI - UPIS U SUDSKI REGISTAR

Tarifni broj 19.

(Taksa za podneske)

- (1) Za prijavu u sudski registar plaća se taksa u iznosu od 50,00 KM.
- (2) Ako se jednom prijavom traži više upisa za isto pravno lice, plaća se samo jedna taksa iz ovog tarifnog broja.

Tarifni broj 20.

(Taksa za upise u sudski registar)

- (1) Za rješenje o upisu osnivanja privrednog društva plaća se taksa u iznosu od 300,00 KM.
  - (2) Za rješenje o upisu osnivanja dijelova privrednog društva, plaća se taksa u iznosu od 100,00 KM.
  - (3) Za rješenje o upisu osnivanja drugih pravnih lica koji nisu navedeni u stavovima (1) i (2) ovog tarifnog broja plaća se taksa u iznosu od 200,00 KM.
  - (4) Za rješenje o upisu lica ovlašćenog za zastupanje pravnog lica plaća se taksa u iznosu od 100,00 KM.
  - (5) Za rješenje o upisu prava vršenja spoljnotrgovinskog prometa plaća se taksa u iznosu od 300,00 KM, pored iznosa iz stava (1) ovog tarifnog broja.
-

(6) Za rješenje o upisima koji nisu obuhvaćeni prethodnim stavovima ovog tarifnog broja plaća se taksa u iznosu od 150,00 KM po jednom upisu.

(7) Za zahtjev za brisanje upisa iz sudskog registra plaća se taksa u iznosu od 100,00 KM.

(8) Za rješenje po zahtjevu za brisanje upisa, plaća se taksa u iznosu od 100,00 KM.

(9) Kada se više privrednih društava spajaju u jedno, pored takse za podnesak plaća se i taksa iz stava (6) ovog tarifnog broja, kao i taksa za upis novoosnovanog privrednog društva.

(10) Ako se jednim podneskom traži više upisa, plaća se taksa za svaki upis posebno.

(11) Za žalbu na rješenje donijeto u postupku upisa u sudski registar plaća se taksa u iznosu od 100,00 KM.

Tarifni broj 21.

(Taksa za objavljivanje upisanih podataka)

(1) Za dostavljanje upisanih podataka radi objavljivanja u službenom glasilu plaća se taksa u iznosu od 50,00 KM.

(2) Za objavljivanje podataka čije je upisivanje traženo jednim podneskom, plaća se samo jedna taksa iz ovog tarifnog broja.

## DIO ŠESTI - UPRAVNI SPOR I POSTUPAK ZA SUDSKU ZAŠTITU

Tarifni broj 22.

(Taksa za tužbu u upravnim sporovima)

(1) Za tužbu protiv upravnog akta plaća se taksa u iznosu od 100,00 KM.

(2) Za tužbu u sporovima iz zdravstvenog, penzijskog i invalidskog osiguranja, dječijeg dodatka, starateljstva, usvojenja i socijalne pomoći plaća se taksa u iznosu od 20,00 KM.

(3) Za tužbu za ponavljanje postupka plaća se taksa u iznosu od 100,00 KM.

(4) Za zahtjev za vanredno preispitivanje sudske odluke u upravnom sporu plaća se taksa u dvostrukom iznosu od takse iz stavova (1) i (2) ovog tarifnog broja.

(5) Ako je uz tužbu protiv upravnog akta stavljen i zahtjev za odlaganje od izvršenja upravnog akta, plaća se taksa u iznosu od 150,00 KM.

Tarifni broj 23.

(Taksa za odluke)

Za presudu u postupku u upravnom sporu plaća se:

---

- a) kada je predmet spora procjenjiv, taksa iznosi 1% od vrijednosti spornog predmeta, s tim da ne može biti manja od 100,00 KM ni veća od 5.000,00 KM;
- b) kada je predmet spora neprocjenjiv taksa iznosi 100,00 KM;
- c) kada se radi o sporovima iz zdravstvenog, penzijskog i invalidskog osiguranja, starateljstva, dječijeg dodatka, usvajanja i socijalne pomoći taksa iznosi 20,00 KM;
- d) ako je predmet spora djelimično procjenjiv, taksa se plaća kao da je predmet procjenjiv.

## DIO SEDMI - POSEBNI SLUČAJEVI

Tarifni broj 24.

(Taksa za sudska uvjerenja i potvrde)

- (1) Za podnesak kojim se traži izdavanje uvjerenja plaća se taksa u iznosu od 5,00 KM.
- (2) Za izdato uvjerenje se plaća taksa u iznosu od 10,00 KM.
- (3) Za potvrdu o pravosnažnosti ili izvršnosti koja se stavlja na sudski otpravak plaća se taksa u iznosu od 5,00 KM.
- (4) Ako se jednim uvjerenjem potvrđuje više činjenica, plaća se jedna taksa.
- (5) Plaćanju takse iz stava (1) ovog tarifnog broja podliježu i elektronski podnesci kao i svaki naknadni podnesak kojim se dopunjava ili mijenja prvobitni podnesak.

Tarifni broj 25.

(Taksa za razmatranje spisa)

Za pismeni podnesak za razmatranje završenih sudskih spisa plaća se taksa u iznosu od 5,00 KM.

Tarifni broj 26.

(Takse za prijepise)

- (1) Za pismeni ili usmeni zahtjev da se izvrši prepisivanje sudskog akta, plaća se taksa u iznosu od 5,00 KM.
  - (2) Za prepisivanje sudskih akata kao i za prepisivanje akata iz zbirke isprava koje je sud izvršio na zahtjev stranke, plaća se od svake započete stranice originala taksa u iznosu od po 5,00 KM.
  - (3) Za izdavanje prijepisa raspravnog zapisnika, kao i za prijepis raspravnog zapisnika koji je izrađen istovremeno sa sastavljanjem originala, plaća se taksa u iznosu od 1,00 KM za svaku započetu stranicu.
  - (4) Za izdavanje transkripta audio zapisa plaća se taksa od 2,00 KM po stranici. Kao cijela stranica smatra se svaka započeta stranica teksta u standardnom formatu.
-

(5) Za izdavanje audio zapisa na CD-u plaća se taksa u iznosu od 5,00 KM.

(6) Ako se istovremeno sudski prijepis ovjerava plaća se posebna taksa za ovjeravanje u iznosu od 5,00 KM.

Tarifni broj 27.

(Taksa za izvode iz sudskog registra i drugih javnih knjiga)

Za izvode iz sudskog registra ili drugih javnih knjiga koje vodi sud, ako se izdaju na zahtjev stranke, plaća se taksa u iznosu od 10,00 KM po stranici.

Tarifni broj 28.

(Taksa za sudski depozit)

(1) Za čuvanje (depozit) novca, stvari i papira od vrijednosti na zahtjev stranke, plaća se godišnje 1% vrijednosti, s tim da iznos takse ne može biti manji od 100,00 KM.

(2) Taksa se plaća za svaku godinu unaprijed, a započeta godina računa se kao cijela.

(3) Ako se vrijednost stvari ne može procijeniti po njihovoj prirodi, izvršiće se procjena od strane vještaka o trošku deponenta.

Tarifni broj 29.

(Taksa za protest isprava)

(1) Za molbu za protest mjenice, čeka i drugih isprava ili ugovora zbog neakceptiranja, neisplate ili neispunjenja, plaća se taksa u iznosu od 5 KM.

(2) Za protest isprave se plaća taksa prema vrijednosti, i to:

a) do 50,00 KM - 5,00 KM,

b) preko 50,00 KM do 500,00 KM - 25,00 KM,

c) preko 500,00 KM - 50,00 KM.

(3) Ako se jednom molbom traži više protesta odnosno zamjena protesta, plaća se jedna taksa za molbu, ali se u tom slučaju plaća posebna taksa za svaki protest, odnosno zamjenu protesta.

Tarifni broj 30.

(Taksa za postupke pred arbitražom)

(1) Za prijedlog stranke da sud postavi arbitra ili predsjednika arbitraže plaća se taksa u iznosu od 10,00 KM.

---

(2) Za prijedlog o izuzeću arbitra plaća se taksa u iznosu od 25,00 KM.

(3) Za sastavljanje potvrde o pravosnažnosti i izvršnosti presude arbitraže plaća se taksa u iznosu od 10,00 KM.

Tarifni broj 31.

(Taksa za zahtjev za izuzeće)

Za zahtjev za izuzeće plaća se taksa u iznosu od 10,00 KM.

Tarifni broj 32.

(Taksa za Jedinstveni pristupni kod)

Za zahtjev za izdavanje Jedinstvenog pristupnog koda - JPK, plaća se taksa u iznosu od 5,00 KM.

---